

'Na frittata di poesii

Pigliavu 'napocu di poesii
li misi di 'na padedda e li frijivu.
Li cunzavu cu sapiri, fantasia,
spirienza e amuri abbunatu.

Mi vinni 'na bedda frittata.
Mmitavu quattu amici
cci la 'mpiattavu
e cci la detti a manciari.

'Un l'avissi ma fattu!
Unu diciva ca era cruda,
l'atru ca era abbrusciata,
l'atru ca era sdisapita.

Mi scurdavu a diri
ca quannu li cunzavu
cci misi tecchia di mmidia.
Propriu chissa iddi gustaru.

Si nni eru senza diri ne tri, ne quattu
lassannu piatta-piatta la bedda frittata.
Ficiru capiri ca 'un c'era nenti di bonu,
ma sapivànu ca era cunzata a duvìri.

Ristavu davanti la porta, ancora
cu lu piattu mani, mentri passaru
du passanti e cci dissi si vulivanu assaggiari
tecchia di frittata.

Cumpiaciuti, accittaru, si la spizzuliàru
propriu davanti a mia, dicennu
c'aviva assà ca un manciàvanu
'na frittata accussì spiciali.

'Un sapivànu comu ringraziàrimi,
nni vulivanu ancora, macàri di prima;
cci dissi nn'haiu una, ma è senza conzi,
cci misi sulu tecchia d'amuri.

"Chissi su li megliu" rispunneru,
si la pigliàru e tra iddi dissiru:
"nni la manciamu quannu semu nintra
accussì l'assapuramu megliu."

Si nni eru cuntenti e suddisfatti
dicennu: "grazii di 'sta manciata
e di 'sta bedda frittata".

2015 Giuseppe Cardella